

Tico Croes

AVP tabata tin hopi bon relacion cu Merca, Venezuela y Hulanda pa combatimento di droga

ORANJESTAD(AAN) -- Tico Croes durante un conferencia di prensa a duna un splicacion amplio con tempo cu e tabata

director di departamento di exterior, a atende e combatimento di droga.

E splicacion aki ta mas bien pa

monstra cu lo cual a sali publica den un revista Mericano no ta cuadra cu berdad y cu ta e Gobierno actual ta hibando un politica pa duna e Gobierno anterior mal nomber.

Segun Tico Croes, na mitar di '87 ora cu a mira cu e politica di rescata Aruba lo logra e metanan proponi, a cuminsa pensa riba e otro banda di formulacion di maneho internacional riba loke por ta e amenazanan pa e desaroyo economico y estabilidad di Aruba.

A cuminsa haci e preparacionnan necesario den formulacion di un maneho integral riba tereno di droga pasobra esey a worde identifica como e amenaza di mas serio cu por stroba e esfuerzo di cualkier Gobierno riba desaroyo economico di Aruba.

E preparacionnan a culmina den algun documento. Na Juni '88 a presenta e politica di defensa activo na Merca, Hulanda y Venezuela.

Segun Croes, Gobierno di AVP a dicidi di traha hopi di cerca cu e paisnan riba menciona.

A stipula riba nivel nacional

kico mester worde haci y e preparacion pa esakinan a tuma lugar. Croes a menciona entre otro e legislacion masha pisa cu na April '89 a ser introduci, introduccion di un patruyero pa Aruba, sistema di radar pa vigila nos costa. Tambe mester a duna mas forza na Polis, Douane y bin cu programa di educacion cu a cuminsa na '88 na Tele Aruba y radio.

Pa loke ta trata maneho internacional ta asina cu na '88 durante e conferencia na Barbados pa promer biaha Gobierno di Aruba a introduci su maneho pa combatimento di droga.

Segun Croes, loke a hala hopi atencion tabata e ponencia di Watty Vos e tempo ey esta cu e paisnan consumidor y productor tin un responsabilidad mucho mas grandi compara cu e paisnan cu pa mala suerte ta ser usa como trampolin.

Croes a monstra cu a haci un analisis geopolitico cu a worde discuti cu Hulanda, Venezuela y Merca. A keda constata cu e accion di Merca tabata duna hopi bon resultado den parti Norte di Caribe esta Bahamas y Jamaica.

Debi na esaki segun Croes,

narcotraficantenan na Colombia a cuminsa mobilisa nan trafico cerca di Aruba, Bonaire y Curaçao y e costa Venezolano pa asina pasa riba Trinidad pa sigui mercado internacional.

Esaki tabata presenta peliger pa Aruba. E Gobierno anterior a bin cu un plan caminda a reparti cooperacion cu diferente departamento Americano.

Croes a monstra cu resultado di esaki tabata cu na '88 por a mira bishita cu frecuencia di coast guard y barconan di guerra Americano. Esaki ta significa presencia di Merca na Aruba cu ta yuda spanta e narcotraficantenan.

Croes a enfatisa cu tabata tin un relacion hopi intensivo cu Merca y Venezuela caminda tabata reina un ambiente di confianza. El a monstra cu representante di diferente departamento Americano a haci bishita na Aruba pa planea un que otro. E bishita di Ministro di Justicia di Venezuela tabata monstra di e bon cooperacion cu tabata tin cu Venezuela.

Tambe Croes a menciona e caso di extradicion di Triana caminda Hulanda a coopera.